

TIMOTEOTA SAN PABLO ISKAIMA KARTA KACHASKAMANDA

¹ Taita Dios nukata munawaskamanda, Jesucristo kachamuwaskami kani; chasaka, paipa suma kaugsaita Jesucristowa karangapa niskamanda Alli Willaita willaspa puringapa. ² Kam Timoteotami kai karta kachaiki. Kam, nukapa kuiaska wambrasinami kapuangi. Taita Dios i nukanchipa Iaia Jesucristo, kamta kuiaspa, kamanda llakispa, suma iuiaiwa kawapuachu.

Cristomanda willai iukaskamanda

³ Nuka, tuta i puncha Taita Diusta mañaspa, kammanda imaurapas iuiarisa, Pai Siñurmi nini. Imasami nukapa ñugpamanda taitakuna, Taita Dios imasa niskasina rurarkakuna: chasallatami nukapas, tukuipi suma iuiaiwa pai ima niskata ruraspa kaugsakuni. ⁴ Nuka kambagmanda llugsikuura, kamba wiki wakaskatami iuiariwá. Chimandami askurinti munakuni, kamta kawangapa; chasaka, alli iuiachiwangapa. ⁵ Kam Cristowa sutipa suma iuiarigtapasmi iuiarini. Ñugpaka, kamba achala mama Loida, nispaka kamba mama Eunisemi chasa Cristowa suma iuiarisa karkakuna. Kammandapasmi iuiani, paikunasinallatata Cristowa suma iuiarisa kagta.

⁶ Chasa kaskamanda, kasami niiki: kamta nuka maki churaura, Taita Dios karamuska; chi karamuskataka masmi kamba iuiapi kaugsachirii

iukangi. ⁷ Mana sugkunata manchaiwa kaugsangapami Taita Dios paipa Ispirituta nukanchita karamurka. Paipa iapa iachaita iukaspas, tukui-kunata kuiaspas, tukuikunawa alli iuiaiwas kaspas kaugsangapami Santu Ispirituta karamurka.

⁸ Chasa mana manchaspallami nukanchipa Iaiamanda iukangi willanga. Nuka paimanda wichkaraiagpipas, mana mancharikungi. Chasapaka, kamtapas Alli Willaimanda llakichigpika, nukasinallatami iukangi pasanga. Taita Diosmi kamta paipa iapa iachaita karanga, ima llakiikunapas chaiagpika, alli iuiachiwa kangapa.

⁹ Taita Dios kikinmi nukanchita kispichispa agllarka, paimandalla kaugsangapa. Nukanchita mana agllarkachu, nukanchi ima allilla ruraskamanda. Pai kikin imasa munaskasinami nukanchita iapa kuiaspas agllarka. Kai alpa manara tiaskauramandatami, Jesucristomanda iuiaspas, nukanchita iapa kuiarka. ¹⁰ Kunaura, Jesucristo nukanchita kispichig samuskawami chi kuiaita kawachigsamurka. Jesucristomi wañuita binsigsamurka. Alli Willaiwa willaspas, mana wañudiru suma kaugsaitami iachachigsamurka, nukanchipas taringapa.

¹¹ Chi Alli Willaita willaspas puringapami Jesucristo agllaska kachamuska runa kani. Chasami nukata chaiawaku, chi Alli Willaita allilla iachachingapa. ¹² Chita willagmandami kaipi llakii-wa pasakuni. Chasa kagpipas, nuka iachanimi piwa iuiarikugta. Chimandami mana manchai-wa kani. Kasapasmi paimanda iachani: pai Alli

Willaita mingawaskata, pai kikin samunkamami iuká kawanga.

¹³ Imasami nuka, kamta allilla rimaikunawa iachachirkaiki: chasallata kaugsangi. Jesucristo-wa suma iuiaripa, tukuikunata kuiaspa kaugsangi. ¹⁴ Santu Ispíritu nukanchiwa sugllapi kaugsagwa, Taita Dios paipa Alli Willai mingaskata suma kawangi, mana sug rigcha tukungapa.

¹⁵ Ñami iachangi, Asia alpamanda tukui nukawa kagkuna nukata sakiwagtakuna. Paipura kankunami Fijelo i Ermójenes. ¹⁶ Waugki Onesiforollami achka biaji kawawagsamurka. Paimi nukata alli iuiachiwagsamurka. Chimandami Iaia Jesusta nini: paipa wasipi kaugsanakuskata sumaglla kawapuachu. Paika, nuka wataska wichkaraiaskamanda iachaspaka, mana ñi imapas mancharirkachu. ¹⁷ Chasapaka, Romama chaiagsamungallawa kallarirkami, mana samaspalla maskawangapa, tariwankama. ¹⁸ Tukurii puncha chaiamuura, Iaia Jesús paimanda llakiripa suma kawapuachu. Ñami iachangi, Efeso puiblupipas pai ikuti ikuti nukanchita aidagta.

2

Jesucristopa alli suldadusina kaskamanda

¹ Kam nukapa wambrasina kagmandami niiki: Jesucristo kamta suma kuiakuskawami iukangi sinchi muruchu tukunga. ² Achkakunapa ñawipi nuka iachachiskata uiawarkangi; chi iachachiskataka Cristomanda tukuipi allilla rurag iachachii pudigkunata nipuangi, paikuna sugkunata iachachichukuna.

³ Kamka, Jesucristopa alli suldadusina kaspá, iukangimi tukui llakiikunata chaskinga. ⁴ Ñi maikan suldadu tukuska mana iukanchu, mana suldadukunapa iuiaita chapuringa. Iukanmi, paita mandag ima niskallata ruranga. ⁵ Chasallata, maikan pugllagpas pugllangapa chaiaskasina mana pugllagpika, primiuta manami chaskinga. ⁶ Chasallata, maikan saikugta tarpug pudinmi, ñugpa pallagringa. ⁷ Chi nuka rimaskataka allilla iuiaripuai. Iaiá Jesusmi iuiái karanga, kam tukui ima niraiaskata iachangapa.

⁸ Jesucristomanda iuiaringi. Paipa ñugpamanda achala taita, atun mandag Davidmi karka. Pai Jesucristo wañuspa, pai kikinmi kaugsarirka. Chi paimanda Alli Willaitami nuka willakuni. ⁹ Nuka chasa willakuskamandami kaipi wataska chariwanakú, wañuchidurtasina. Ikuti Diospa Rimaika mana wataska kanchu. ¹⁰ Chimandami Taita Dios agllaska runakunamanda tukui llakiita chaskikuni; chasaka paikunapas, kispirispá, Jesucristowa mana puchukaridiru suma punchapi chaiagringapa.

¹¹ Kai niraiaskaka, sutipami ka:
Nukanchi paiwa sugllapi wañuska niraiagpika,
paillawantami kaugsaringapa kanchi.

¹² Paimanda llakii iukagpika,
paiwa sugllapimi kagringapa kanchi, mandangapa.

“Paita mana rigsínichu” nigpika,
paipasmi nukanchimanda chasallata ningapa ka.

¹³ Nukanchi paimanda kungarigpipas,
paika nukanchimanda mana kungarinchu.
Pai ima niskata,

pai kikin mana pudinchu:
 “Mana chasa rurasa” ningapa.

Diuspa ñawipi, allilla rurag kawariskamanda

¹⁴ Chi niraiaskata iuiachipuai. Diuspa ñawipi nipuai, ianga rimai niraiaskakunamanda mana ainichirinakuchu. Chi ainichirinakuskaka, ñi imapa manima allilla kanchu. Chi uiagkuna allilla iuianakuskatami pandachí. ¹⁵ Kamka, mana sakirispallami sinchi iuiyai iukangi; chasaka, Diuspa ñawipi allilla rurag kawaringapa. Chasa allilla ruraspami ñi imapipas mana mancharispalla kankangi. Sutipa Suma Rimaita imasa niraiaskasina allilla iachachipuangi.

¹⁶ Kai alpamandalla ianga parlukunata mana uiakungi. Chasa rimagkunaka, mailla mailla Taita Diusta mana manchagmi tukunkuna.

¹⁷ Chasa pandachispa iachachigkunaka, uiagkunata ismuchigsinami rurankuna. Chasa iachachigpura kankunami Imeneo i Fileto. ¹⁸ Paikunaka, sutipa Alli Willaita sakispami llullaspa ninakú: “Cristowa tukuskakunaka, ñami kaugsariska kanchi”. Chasa rimaikunawami sugkuna Cristowa iuiarigkunata pandachinakú. ¹⁹ Chasa ninakugpipas, Taita Dius kikin willaskaka wasita kallariska suma rumipi saiachiskasinami ka, ñi pipas mana kuiuchingasina. Chipika, kasami willaraiá:

Atun Taita Diuska,
 paipa kaskakunata
 allillami rigsí.
 Kasapasmi willaraiá:

Tukuikuna Jesús nukapa iaia kagta iuiarig-
kunaka,
jiru iuiaikunata sakichukuna.

²⁰ Kasapas. Atun wasipi mana tianchu kurita i kulkita ruraska upiadirukunalla. Kaspita i alpata ruraskakunapasmi tia. Chikunaka kankunami: sugkunaka, atun punchakunapalla; ikuti sugkunaka, imaurapipapas. ²¹ Nukanchi atun punchapasina kangapa chaianmi, tukui jiru rurai-kunata sakispa kaugsangapa. Chasaka, Iaia Jesuspalla kaspera, paimandalla allipimi kasunchi. Tukuipi allilla rurangapa allichiskasinami kasunchi.

²² Musukunapa mana allilla iuiyai munaikunata anchuriskasina kaugsangi. Alli ruraspa, Cristowa suma iuiaripa, alli kuiaspa, sumaglla kaugsangi. Iaia Jesusta tukuipi suma iuiaiwa mañagkunawa sugllapi kangi. ²³ Ianga upasina rimanakuskata mana uiakungi. Ñami iachangi, chasa rimanakuskamanda piñachinakudiru chaiamudur kagta. ²⁴ Iaia Jesuspa lutrinsina mana iukanchu, ñi piwapas piñachinakuspa kaugsanga. Chasapaka iukangimi, tukuikunawa alli kanga, tukuikunata allilla iachachinga i tukuikunawa mana piñanakuspalla iuiaiwa kanga. ²⁵ Kamta piñagkunata rimangapa chaiaura, mana atuniachirispalla iuiiachingikunata. Chasa iuiachigpika, Taita Dioska paikunata pudinmi karanga, paiwa tukugsamuspa, sutipa Alli Willaita iachagsamungapa. ²⁶ Chiwanka, paikuna pudinkunami, rigcharigsina tukuspa, iaia kuku ima munakuskata rurangapa wataskasina tugllamanda mitikunga.

3

Tukurii punchakuna, imasa runakuna kaugsan-gapa kaskamanda

¹ Kasapas iachapuai: tukurii punchakuna chaiamuuraka, iapa llakii punchakunami chaiamungapa ka. ² Chi punchakuna kaugsanakugka, kikinkunamandalla iukangapa iuiaiwa, iapa kulkita kuiaspa munaiwami kangapa kankuna. Chasakunaka, atuniachirispá, nirispami kankuna: “Nukami tukuikunamanda mas kani”. Taita Diusta kamispami rimangapa kankuna; taitata i mamata mana uiangapa kankunachu; mana “Pai” nispallami kangapa kankuna; Taita Diusta mana manchangapa kankunachu; ³ ñi pitapas mana kuiangapa kankunachu; piñanakuspaka, mana kungarigkunami kangapa kankuna; iangami pitapas juchachispa kangapa kankuna; jiru iuiaikunata mana arkangapa pudingapa kankunachu; ima kawariskata puchukaspami ringapa kankuna; tukui allilla kaskakunatapasmí puchukangapa munangapa kankuna; ⁴ pitapas llullaspa apichispami munangapa kankuna; mana iuiarispallami imapas rurangapa kankuna; atuniachirispá iuiaspami kangapa kankuna. Taita Diusta munangataka, kikinkunamandallami iuiarispá kangapa kankuna. ⁵ Taita Diuswa kagsinami kawaringapa kankuna. Nigpika, kikinkunapa ruraikunawaka mana chasa kagta kawachinkunachu.

Chasakunataka sakingi, anchuringi,
ianga kawangi, paikunawa mana kangi.

⁶ Paipuramanda sugkuna, wasikunama llullachispa iaikuspa, mana iuiaiiug pandarii iukaska warmikunatami maskankuna; chi warmikunaka, sug rigcha sug rigcha jiru munaiwa aliui tukuskasina kaspas, ⁷ iachaikui iachaikui apakugpipas, sutipa Alli Willaita mana imaurapas iachagsamungapa kankunachu. ⁸ Imasami Janes i Jambres, jiru iachakuna kaspas, mana munarkakuna Moiesta uangapa: chasallatami chi llullachig runakuna, sutipa Alli Willaita mana uangapa munanakú. Iapa jiru iuiaikunami iukankuna. Taita Diuswa kagsina kawarispapas, ianga sug rigchami iuiarinakú. ⁹ Chasa pandachigkuna, mana iapa unaiangapa kankunachu. Imasami chi Moiesta iskai mana munagkuna, upasina kawachirirkakuna: chasallatami chi pandachigkuna, tukuikunapa ñawipi upasina kawachiringapa kankuna.

Timoteota ima rurangapa, San Pablo mingaska-manda

¹⁰ Kamka, allillami iachangi, nuka imasa iachachikuskata, imasa kaugsakuskata, imasa iuiakuskata, imasa Cristowa suma iuiarispas kaskata, imasa sugkunawa mana piñanakuspalla kaskata, imasa sugkunata kuiaspa kaskata, imasa allillata charirig kaskata, ¹¹ imasa jiru iuiaiwa kalpachii tukuskata; imasa iapa llakiikuna iukaskatapasmi allilla iachangi. Kammi iachangi, imasami Antioquia, Ikonio i Listra puiblukunapi nuka iapa llakiikuna iukaspa, kalpachii tukurkani. Tukui chikunamanda, Iaias Jesusmi kispichiwarka. ¹² Jesucristomandalla sumaglla kaugsangapa munagkunata, tukuikunatami jiru rurangapa munan-

gapa kankuna. ¹³ Chi jiru pandachispa ruragkunaka, mas jiru mas jirumi ruraspalla kangapa kankuna. Sugkunatami pandachingapa kankuna. Paikunatapas, sugkunami pandachingapa kankuna.

¹⁴ Kamka, ima Cristomanda iachaikuspa iuiakuskata mana sakispalla kaugsangi. Allillami iachangi: pikunami kamta iachachirkakuna.

¹⁵ Wawa kauramandatami Diospa tukuipi iapa alli Rimaita iachaikuska kangi. Paipa Rimaiwa pudirinmi, allilla iachaikuspa, Jesucristowa suma iuiarispas, kispiringa. ¹⁶ Tukui chi rimaikuna,

Taita Dios kikin iuiachiskawa ruraskami ka. Paipa Rimaiwa allillami ka iachachingapa i mana alli ruragkunata iuiachingapa; chasaka, mana allilla ruraikunata sakichukuna. Chasallatami alli ka iachachingapa, Taita Dios ima munaskata ruraspa kaugsanakungapa. ¹⁷ Chasaka Taita Diospa runakuna, suma iuiachiska i allilla iachachiskami kangakuna, tukuipi allilla ruraspa kaugsangapa.

4

¹ Taita Diospa ñawipi i Iaias Jesucristopa ñawipimi kasa niiki. Pai Jesucristomi samungapa ka, kaugsakunata i wañuskakunatapas ima ruraskakunamanda iuiachispa kawachingapa. ² Diospa Rimaita allilla iuiachispa, munanakuskata i mana munanakuskatapas willangi. Imaurapas iachachingi, mana piñaspalla. Mana allilla rurasakunata sumaglla iuiachingi. Mana sambaiaspalla, tukuikunata rimangi, allilla kaugsachukuna. ³ Allilla iachachiikunata mana uianga-

pa punchakuna, ñallami chaiamungapa ka. Chi mana uiagkunaka, kikinkuna imasa munaska-sina achka iachachigkunatami maskangakuna, pai kikinkuna ima munaskallata iachaikungapa. ⁴Sutipa Alli Willaita mana uiaspa, munangapami kankuna, ianga parlukunallata uiangapa. ⁵Ikuti kamka, mana iapa urdimal kangi. Ima llakii chaiagpika, upalla kangi. Alli Willaita willaspalla kangi. Kam tukui rurangapa chaiaskata allilla ruraspa kangi.

⁶Nukata wañuchiwangapa puncha ñami chaia-muku, chiura Taita Diusta karagsina tukuspa, paita alli iuiachingapa. ⁷Alli Willaita willaspa, alli suldadusinami kunankama kani. Kalpa-kuskasinapi chaiangapa kaskama ñami chaia-kuni. Jesuswa suma iuiariskata mana sakispallami kunankama kaugsakuni. ⁸Chasa allilla kaugsakuskamanda, ñami llaugtu allichiska sua-waku. Chi llaugtutaka, Iai Jesusmi, pai samug puncha iukachiwagsamungapa ka. Paimi ka imasa chaiaskasina justisiai rurag. Chi llaugtutaka mana nukallata karawagsamungapa kanchu. Maikan pai samungapa puncha chaiangapa suianakuskatapasmi chasallata karagsamungapa ka.

Timoteo ima rurai iukaskamanda

⁹Imasa rurasapas, utkalla samui, nukata kawawangapa. ¹⁰Waugki Demaska, sitawaspami rirka Tesalónika puibluma. Kai alpapi tiaskakunallatami pai mas munarirka. Waugki Kreskenteka, Galasia alpamami rirka. Waugki Titoka, Dalmasia alpamami rirka. ¹¹Waugki Lucasllami nukawa

ka. Kam samuura, waugki Marcosta pusamuwangi. Paipas allillami tukuwanga, nukawa Alli Willaita willangapa. ¹² Waugki Tikikotaka Efeso puiblumami kacharkani. ¹³ Kam samuura, Troas puiblupi waugki Karpopa wasipi nuka sakiska churaridiruta i librukunata apamuwangi. Chimandaka, iskribiraiaska karakunata mana kungaris palla apamuwangi.

¹⁴ Alejandro iruta imapas ruragka, nukata jirumi rurawarka. Pai ima ruraskamanda, Iaia Jesusmi llakiripuanga. ¹⁵ Paimi nukanchi rimaskata: “Chasaka mana kanchu” sinchi nikurka. Chimanda kampas, paita mana rimangi.

¹⁶ Nukata justisiapagma musuglla apawauraka, ñi pipas mana tiarkachu, nukamanda rimapuangapa. Tukuikunami, nukata sakiwaspa, rirkakuna. Nuka ninimi: paikunataka, Taita Dios mana imapas piñapuachu. ¹⁷ Iaia Jesusmi, nukawa sugllapi kaspera, tukuipi animu karawarka. Chasawami Alli Willaita nuka allilla willarkani, tukui mana judíu kagkunapas uiangapa. Chi pucha, wañuchiwangapa ninakuskamandami Iaia Jesús nukata kispichiwarka. ¹⁸ Tukui mana alli runakunamandapasmi kispichiwangapa ka. Michawangapami ka, sug luarpi pai suma mandakuskapi nuka chaiagrinkama. Pai Jesusta imaurapas nisunchi: “Kam, iapa suma atunmi kangi, maituku waranga waranga watakuna ialigpipas”. Chasa kachu.

Kaiakama, niskamanda

¹⁹ Pani Priskata, paipa kusa Akilata i waugki Onesiforopa wasipi tukui kaugsanakuskata: “Puangi” nipuai. ²⁰ Waugki Erastoka, Korinto

puiblupimi chisiaku. Waugki Trofimotaka Mileto puiblupi ungugmi sakirkani. ²¹ Kamka, utkalla samui, manara tamia punchakuna chaiamugpi. Eubulo, Pudente, Lino, Klaudia, tukui sug waugkindikuna i panikunapasmi kamta: “Puangi” ninakú.

²² Iaia Jesús, kamwa kachu. Taita Dios, kamwa kagkunata sumaglla kawapuachu.

Kaipimi Taita Dius Rimaku New Testament in Inga

copyright © 2009 Wycliffe Bible Translators, Inc.

Language: Inga

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Inga

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
7cb53c42-7354-5f68-b71b-5115a92bd97a